

辭納言藤大卿。有左九條宅。地餘貳町。屋則五間。東隣施藥慈院。西近眞言仁祠。生休歸眞原迫南。衣食出內坊居北。涌泉水鏡而表裏。流水汎溢而左右。松竹風來琴箏。梅柳雨催錦繡。春鳥啁聲。鴻鴈于飛。熱渴臨即除。清涼憩即至。兌白虎大道。離朱雀小澤。緇素逍遙何必山林。車馬往還朝夕相續。

貧道。有意濟物。竊庶幾置三教院。一言吐響。千金即應。永捨券契。遠期。冒地。不勞給孤之敷金。忽得勝軍之林泉。本願忽感。樹名曰綜藝種智院。試造式記曰。

若夫。九流六藝。濟代之舟梁。十藏五明。利人之惟寶。故能三世如來。兼學而成大覺。十方賢聖綜通而證遍知。未有。一味作美膳。片音調妙曲者也。立身之要。治國之道。斷生死於伊陀。證涅槃於蜜多。弃此而誰。是以。前來聖帝賢臣。建寺置院。仰之弘道。雖然。毘訶方袍。偏翫佛經。槐序茂廉。空耽外書。至若三教之策。五明之簡。擁泥不通。肆建綜藝種智院。普藏三教招諸能者。所冀三曜炳著照昏夜於迷衢。五乘竝鑣馭羣庶於覺苑。

或難曰。然猶。事漏先覺。終未見其美。何者。備僕射之二教。石納言之芸亭。如此等院。竝皆有始無終。人去跡穢。

答。物之興廢必由人。人之昇沈定在道。大海資衆流。以致深。蘇迷越衆山以成高。大廈群材之所支持。元首股肱之所扶保。然則。多類者難竭。寡偶者易傾。自然之理使然。今所願者。一人降恩。三公勳力。諸氏英貴。諸宗大德。與我同志。百世成繼。難者曰。善也。或有人難曰。國家廣開庠序。勸勵諸藝。霹靂之下。蚊響何益。答。大唐城。坊坊置閭塾。普教童稚。縣縣開鄉學。廣導青衿。是故。才子滿城。藝士盈國。今是華城。但有一大學。無有閭塾。是故。貧賤子弟。無所問津。遠坊好事。往還多疲。今建此一院。普濟瞳矇。不亦善哉。難者曰。若能果如此。盡美盡善。與兩曜爭明。將二儀競久。益國之勝計。利人之寶州。餘雖不敏。投一簣哉九仞。添涓塵乎八埏。報四恩之廣德。爲三點之良因。

招師章

語曰。里仁爲美。擇不處仁焉得知。又曰。遊於六藝。經曰。初阿闍梨兼綜衆藝。論曰。菩薩爲成菩提。先於五明處求法。是故。善財童子。巡百十城。尋五十師。常啼菩薩。常哭一市。切求深法。然則。得智在仁者之處。成覺資五明之法。求法必於衆師之中。學道當在衣食之資。四者備而然後有功。是故。設斯四緣。利濟群生。雖云有處有法。若無師者。無由得解。故先請師。師有種。一道。二俗。道所以傳佛經。俗所以弘外書。眞俗不離。我師雅言。

一 道人傳受事

右顯密二教。僧意樂。兼通外書。任住俗士。有意樂學內經論者。法師心住四量四攝。不辭勞倦。莫看貴賤。隨宜指授。

一 俗博士教受事

右九經九流。三玄三史。七略七代。若文。若筆等書中。若音。若訓。或句讀。或通義。一部一帙。堪發瞳矇者住。若道人意。樂外典者。茂士孝廉。隨宜傳授。若有青衿黃口。志學文書。絳帳先生。心住慈悲。思存忠孝。不論貴賤。不看貧富。隨宜提撕。誨人不倦。三界吾子。大覺師吼。四海兄弟。將聖美談。不可不仰。

一 師資糧食事

夫人非懸瓠。孔丘格言。皆依食住。釋尊所談。然則。欲弘其道。必須飯其人。若道。若俗。或師。或資。有心學道者。竝皆須給。雖然道人。素事清貧。未辨資費。且入若干物。若有意益國利人。志求出迷證覺者。同捨涓塵。相濟此願。生生世世。同駕佛乘。共利群生。

天長五年十二月十五日

大僧都空海記